

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**R J E Š E N J E**

**po Prijavi namjere koncentracije između privrednih subjekata ISS GLOBAL A/S  
Copenhagen i ECO servis d.o.o. Sarajevo**

**Sarajevo**  
**Novembar, 2008. godine**



Broj: 01-05-26-038-10-II/08  
Sarajevo, 20.11.2008. godine

Na osnovu člana 25. stav (1) tačka e), člana 42. stav (1) tačka d), a u skladu s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), a po Prijavi namjere koncentracije privrednog subjekta «ISS GLOBAL A/S», Bredgrade 30, DK-1260, Copenhagen, Kraljevina Danska i «ECO Servis» društvo sa ograničenom odgovornošću za trgovinu i čišćenje, Vilsonovo šetalište 10, 71000 Sarajevo, Bosna i Hercegovina, podnesenoj po punomoćniku advokatu Branku Mariću, ul. Mehmeda Spahe 26, 71000 Sarajevo, zaprimljenoj dana 22.09.2008. godine pod brojem: 01-05-26-038-II/08, Konkurencijsko vijeće, na 76. (sedamdesetšesta) sjednici održanoj dana 20.11.2008. godine, je donijelo

### **R J E Š E N J E**

1. Ocjenjuje se dopuštenom koncentracija na tržištu pružanja usluga čišćenja objekata na teritoriji Bosne i Hercegovine, koja će nastati sticanjem kontrole kupovinom većine dionica privrednog subjekta «ECO Servis» d.o.o. Sarajevo, Vilsonovo šetalište 10, 71000 Sarajevo, Bosna i Hercegovina od strane privrednog subjekta «ISS GLOBAL A/S», Bredgrade 30, DK-1260, Copenhagen, Kraljevina Danska.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Konkurencijsko vijeće je zaprimilo dana 22.09.2008. godine pod brojem: 01-05-26-038-II/08, Prijavu namjere koncentracije (u daljem tekstu: Prijava), u smislu člana 16. stav (1) Zakona o konkurenciji, privrednog subjekta «ISS GLOBAL A/S», Bredgrade 30, DK-1260, Copenhagen, Kraljevina Danska (u daljem tekstu: «ISS GLOBAL A/S» ili Podnosilac prijave) i privrednog subjekta «ECO Servis» d.o.o. Sarajevo Vilsonovo šetalište 10, 71000 Sarajevo (u daljem tekstu: »ECO Servis«).

Prijava je podnesena od strane advokata Branka Marića, Mehmeda Spahe 26, 71000 Sarajevo (punomoć od 24.09.2008. godine izdata od strane Christian Jakobsen, podpredsjednika «ISS GLOBAL A/S» (u daljem tekstu: Podnosilac prijave).

Konkurencijsko vijeće je, uvidom u podnesenu Prijavu utvrdilo, da ista nije uredna i kompletna, u smislu člana 30. Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterijumima za ocjenu koncentracija privrednih subjekata («Službeni glasnik BiH», broj 95/06), (u daljem tekstu: Odluka), te je dana 02.10.2008. godine, zatražilo dopunu prijave dopisom broj: 01-05-26-038-1-II/08, u skladu sa članom 31. Zakona.

Podnosilac prijave je dana 09.10.2008. godine dopisom broj 01-05-26-038-2-II/08 dostavio dio potrebne dokumentacije i ujedno zatražio produženje roka za dostavu dokumentacije za 15 dana, iz opravdanih razloga, što je od strane Konkurencijskog vijeća, dana 17.10.2008. godine dopisom broj: 01-05-26-038-3-II/08 i odobreno, u skladu sa članom 31. Zakona.

Nakon dostave dijela potrebne dokumentacije zaprimljene dana 21.10.2008. godine, uz dopis broj: 01-05-26-038-4-II/08, Konkurencijsko vijeće je utvrdilo da prijava i dalje nije u skladu sa članom 30. Zakona i čl. 8., 9. i 10. Odluke, te je dana 30.10.2008. godine Podnosiocu zahtjeva uputilo ponovni Zahtjev za dopunu i usklađivanje prijave.

Prijava je kompletirana zahtjevanom dokumentacijom dana 04.11.2008. godine dopisom broj: 01-05-26-038-6-II/08 i dana 14.11.2008. godine dopisom broj 01-05-26-038-7-II/08.

Prijemom propisane dokumentacije Konkurencijsko vijeće je utvrdilo Prijavu urednom i kompletnom te dana 17.11.2008. godine izdalo Potvrdu o prijemu kompletne i uredne prijave broj 01-05-26-038-8-II/08, u skladu sa članom 30. stav (3) Zakona.

Podnosilac prijave je naveo, u skladu s članom 30. stav (2) Zakona da zahtjev za ocjenu koncentracije ne namjerava podnijeti niti jednom nadležnom organu u nekoj drugoj zemlji.

Konkurencijsko vijeće u postupku ocjene predmetne koncentracije je utvrdilo sljedeće činjenice:

Prijava je podnesena u zakonom propisanom roku od 8 dana od dana zaključivanja Ugovora o prenosu udjela potpisanog između privrednog subjekta «ISS Global A/S» i fizičkih lica Leo Ivanjko i Teodora Zupan, vlasnika udjela privrednog subjekta «ECO Servis», u smislu člana 16. stav (1) Zakona.

## **1. Učesnici predmetne koncentracije**

Učesnici predmetne koncentracije su privredni subjekat «ISS GLOBAL A/S», Copenhagen, Kraljevina Danska i «ECO Servis» društvo sa ograničenom odgovornošću za trgovinu i čišćenje, Sarajevo, Bosna i Hercegovina.

### **1.1. «ISS GLOBAL A/S», Copenhagen, Kraljevina Danska**

Privredni subjekat «ISS GLOBAL A/S», Copenhagen, Bredgrade 30, DK-1260, Copenhagen Kraljevina Danska, osnovan je 1901. godine, i registrovan pod brojem 21408395 kod Uprave za privredu i preduzeća Kraljevine Danske, sa pretežnom djelatnosti u pružanju usluga čišćenja i održavanja objekata.

Navedeni privredni subjekt je kontrolisan od strane privrednog subjekta «ISS Holding A/S», Bredgrade 30, Copenhagen, Kraljevina Danska koji je osnovan od strane «GFK HOLDING» ApS, Copenhagen, Kraljevina Danska.

Subsidijarno društvo privrednog subjekta «ISS GLOBAL A/S» je privredni subjekat «ISS Facility Services spol s.r.o.», Mokran Zahon 2, Bratislava, Slovačka Republika, koji u Bosni i Hercegovini ima u 100,0% vlasništvu privredni subjekt «ISS Facility Services» d.o.o. Sarajevo i privredni «ISS Facility Services» d.o.o. Banja Luka.

### **1.1.1. «ISS Facility» d.o.o. Sarajevo**

Privredni subjekat «ISS Facility» d.o.o. Sarajevo je upisan u sudski registar Općinskog suda u Sarajevu dana 23.08.2007. godine, pod brojem 1-26435, sa pretežnom djelatnosti čišćenja objekata i pružanja usluga održavanja. Privredni subjekat «ISS Facility Services spol s.r.o.» Bratislave, Republika Slovačka je 100,0% vlasnik privrednog subjekta «ISS Facility».

Prema podacima iz Prijave navedeni privredni subjekt pojedinačno ili zajedno nema više od 10,0% udjela u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

### **1.1.2. «ISS Facility» d.o.o. Banja Luka**

Privredni subjekat «ISS Facility» d.o.o. Banja Luka je upisan u sudski registar Osnovnog suda u Banja Luci, dana 22.12.2006. godine pod brojem 1-15795-00, sa pretežnom djelatnosti čišćenja, sanitarnim i drugim sličnim djelatnostima. Privredni subjekat «ISS Facility Services spol s.r.o.» Bratislave, Republika Slovačka je 100,0% vlasnik privrednog subjekta «ISS Facility».

Prema podacima iz Prijave navedeni privredni subjekt pojedinačno ili zajedno nema više od 10,0% udjela u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

### **1.2. «ECO SERVIS» d.o.o. Sarajevo**

Privredni subjekat «Eco Servis» d.o.o. Sarajevo, Vilsonovo šetalište 10, 71000 Sarajevo, upisan je dana 15.11.2005. godine u sudski registar Općinskog suda u Sarajevu, pod brojem 1-25400, i s pretežitom djelatnošću pružanja usluga čišćenja objekata i sličnim djelatnostima.

Vlasnička struktura navedenog privrednog subjekta je slijedeća: fizičko lice Leo Ivanjko, (..)\*\*<sup>1</sup> Republika Slovenija sa (..)\*\* udjela i fizičko lice Teodora Zupan(..)\*\* Republika Slovenija sa (..)\*\* vlasničkog udjela.

Prema podacima iz Prijave fizičko lice Leo Ivanjko u Bosni i Hercegovini ima vlasničke udjele u privrednom subjektu DUF Bosinvest d.o.o. Sarajevo, Vilsonovo šetalište 10, 71000 Sarajevo i privrednom subjektu Maximus d.o.o. Sarajevo, Mohameda Kantardžića 3, 71000 Sarajevo, dok fizičko lice Teodora Zupan nema vlasničkih udjela u drugim privrednim subjektima.

## **2. Obaveza prijave namjere predmetne koncentracije**

Obaveza prijave namjere koncentracije privrednih subjekata postoji, u smislu člana 14. stav (1) pod a) Zakona, ako ukupni godišnji prihod učesnika koncentracije ostvaren prodajom roba i/ili usluga na svjetskom tržištu iznosi 100 miliona KM po završnom računu u godini koja je prethodila koncentraciji, pri čemu je najmanje jedan od učesnika koncentracije registriran ili djeluje na teritoriji Bosne i Hercegovine.

Ukupni godišnji prihodi privrednih subjekata učesnika predmetne koncentracije na dan 31. decembra 2007. godine, iznose:

---

(..)\*\*<sup>1</sup> podaci predstavljaju poslovnu tajnu

Tabela 1.

R.b.	Naziv privrednog subjekta	Prihod na svjetskom nivou (KM)	Prihod u BiH (KM)
01.	ISS GLOBAL A/S, Kraljevina Danska	(..)** <sup>2</sup>	(..)**
02.	ISS Holding A/SK, Kraljevina Danska	(..)**	(..)**
03.	ECO Servis Sarajevo	(..)**	(..)**
04.	ISS Facility Sarajevo	(..)**	(..)**
05.	ISS Facility Banja Luka	(..)**	(..)**

Izvor: podaci iz Prijave

Godišnji prihod učesnika koncentracije predstavlja ukupan prihod bez poreza na dodanu vrijednost i drugih poreza, koji se direktno odnose na učesnika koncentracije, na svjetskom i na tržištu Bosne i Hercegovine, u smislu člana 8. tačka h) predmetne Odluke.

Budući da su učesnici koncentracije ispunili uslove, u smislu člana 14. stav (1) pod a) Zakona, u pogledu ostvarenog ukupnog godišnjeg prihoda učesnika koncentracije ostvarenog prodajom roba i/ili usluga na svjetskom tržištu u iznosu od 100 miliona KM po završnom računu u godini koja je prethodila koncentraciji, pri čemu je najmanje jedan od učesnika koncentracije registriran ili djeluje na teritoriji Bosne i Hercegovine, privredni subjekti učesnici koncentracije su obavezni podnijeti Prijavu.

### 3. Pravni okvir ocjene predmetne koncentracije

Konkurencijsko vijeće u provedbi postupka ocjene dopuštenosti predmetne koncentracije primjenilo je odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterija za ocjenu koncentracija privrednih subjekata.

Konkurencijsko vijeće je, na osnovu člana 43. stav (7) Zakona, koristilo sudsku praksu Evropskog suda i odluke Evropske komisije, kao i kriterije i standarde iz Obavještenja Komisije o izračunavanju ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

### 4. Pravni osnov i oblik predmetne koncentracije

Podnosilac prijave je kao pravni osnov predmetne koncentracije dostavio Ugovor o kupoprodaji udjela potpisan dana 15.09.2008. godine, između privrednog subjekta «ISS Global A/S» Copenhagen, Kraljevina Danska i fizičkih lica Leo Ivanjko i Teodora Zupan, vlasnicima «ECO Servisa») d.o.o. Sarajevo, kojim Ponosilac prijave stiče 100,0% vlasništvo nad privrednim subjektom «ECO servis» d.o.o. Sarajevo.

Pravni oblik predmetne koncentracije je sticanje kontrole ili dominantnog uticaja jednog privrednog subjekta («ISS Global A/S») nad drugim privrednim subjektom («ECO servis» d.o.o.), sticanjem kupovinom većine dionica ili udjela, u skladu sa članom 12. stav (1) tačka b) Zakona.

### 5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti

(..)\*\*<sup>2</sup> podaci predstavljaju poslovnu tajnu

na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajenu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda predmetne koncentracije je tržište čišćenja objekata.

Relevantno tržište u geografskom smislu predmetne koncentracije je tržište Bosne i Hercegovine.

Prema navedenom, relevantno tržište predmetne koncentraciji je tržište čišćenja objekata na teritoriji Bosne i Hercegovine.

## 6. Analiza relevantnog tržišta predmetne koncentracije u Bosni i Hercegovini

Tržišni udjeli učesnika koncentracije i njihovih glavnih konkurenata na relevantnom tržištu pružanja usluga čišćenja objekata na teritoriji Bosne i Hercegovine, u 2007. godini:

Tabela 2.

R.b.	Naziv privrednog subjekta	Tržišni udio u (%)
01.	EUROSAN d.o.o. Mostar	20-30
02.	MAJORDOMO d.o.o.Sarajevo	10-20
03.	EUROSAN d.o.o. Banjaluka	0-10
04.	CRISTAL d.o.o. Sarajevo	0-10
05.	EKOING d.o.o. Sarajevo	0-10
06.	KONRAD d.o.o. Sarajevo	0-10
07.	TOPFIT d.o.o .Banjaluka	0-10
<b>08.</b>	<b>ECO Servis d.o.o. Sarajevo</b>	<b>0</b>
<b>09.</b>	<b>ISS Facility d.o.o. Banjaluka</b>	<b>0-10</b>
10.	KONIS d.o.o. Sarajevo	0-10
11.	SERVIS d.o.o. Široki brijeg	0-10
12.	PLAVI SERVIS d.o.o. Stolac	0-10
13.	ECOTAJM d.o.o. Sarajevo	0-10
14	Ostali	30-40
	<b>UKUPNO</b>	<b>100</b>
	<b>UKUPNO učesnici koncentracije (8+9)</b>	<b>0-10</b>

Izvor: podaci iz Prijave

Iz prikazanih podataka (Tabela 2.) proizilazi da najveći tržišni udio od (..)\*\*<sup>3</sup> ima privredni subjekat Eurosan doo Mostar, dok tržišni udio učesnika predmetne koncentracije, njihovih subsidijarnih društava i ostalih konkurenata na relevantnom tržištu, iznosi (..)\*\*<sup>3</sup>. Privredni subjekt ISS Facility d.o.o. Sarajevo nema tržišni udio u 2007. godini jer nije bio aktivan.

(..)\*\*<sup>3</sup> podaci predstavljaju poslovnu tajnu

Navedeni podaci također pokazuju da je relevantno tržište slabo koncentrisano i da na njemu djeluje veliki broj privrednih subjekata s pojedinačnim relativno niskim tržišnim udjelom, koje onemogućava stvaranje dominantnog položaja.

## **7. Ocjena predmetne koncentracije**

Konkurencijsko vijeće je analizom podataka, u smislu kriterija člana 17. Zakona, posebno strukture relevantnog tržišta, tržišnih udjela učesnika koncentracije i konkurenata utvrdilo da predmetna koncentracija ne može imati za posljedicu sprječavanje, ograničavanje niti narušavanje tržišne konkurencije na relevantnom tržištu pružanja usluga čišćenja i održavanja objekata na teritoriji Bosne i Hercegovine.

Pri donošenju odluke Konkurencijsko vijeće je imalo u vidu prednost za potrošače koju namjeravana koncentracija ima i to u vidu povećanja kvaliteta usluga koje bi se obavljale po evropskim standardima.

Uzimajući u obzir sve iznesene činjenice i podatke koji su prethodili donošenju odluke, Konkurencijsko vijeće je ocijenilo predmetnu koncentraciju dopuštenom, u smislu člana 18. stav (2) tačka a) Zakona, kao što je odlučeno u dispozitivu ovog Rješenja.

## **8. Administrativna taksa**

Podnosilac Prijave na ovo Rješenje, u skladu sa članom 2. stav (1) tarifni broj 107. tačka d) 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

## **9. Pouka o pravnom lijeku**

Ovo Rješenje je konačno i protiv istog nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

**Predsjednik**

**Ibrica Lakišić**